

BON DIA *Aruba*


Diahuebs 13 di September, 2007

www.bondia.com

Email: noticia@bondia.com

1,50 Florin (incl. BBO)

Scol di dolfijn Steno ta bolbe Aruba



ORANJESTAD - Un biaha mas Aruba a haya bishita di, segun tur indicacion, e mesun scol di Steno bredanensis, cu siman pasa tabata den awanan dilanti Malmok. Segun e prome indicacion, e scol grandi di mas o menos 100 dolfijn tabata cerca di tera, pero finalmente un grupo mas chikito a bolbe mas cerca di canto, unda a observa cuater baby. Pa mas informacion lesa pagina 13.

LOCAL

Scol di dolfijn Steno bredanensis ta bolbe Aruba

Famia ta bolbe crece cu dos otro baby



ORANJESTAD - Un biaha mas Aruba a haya bishita di, segun tur indicacion, e mesun scol di Steno bredanensis cu siman pasa tabata den awanan dilanti Malmok. Segun e prome indicacion, e scol grandi di mas o menos 100 dolfijn tabata cerca di tera, pero finalmente un grupo mas chikito a bolbe mas cerca di canto, unda a observa cuater baby. Esaki ta nifica cu a nace mas dolfijn ainda. Manera tabata e caso siman pasa, miembronan

di Aruba Marine Mammal Foundation a keda observa e animalnan aki, specialmente pa evita cu otro boto of personanan por bula den e scol y asina trece confusion. Manera Bon Dia Aruba a señalá siman pasa, ta trata aki di e tipo di dolfijn riba cua tin masha poco dato conoci. Esaki pa motibo cu normalmente e dolfijnnan aki ta keda den lama hundo, y no ta yega mucho cerca di tera firme. Sinembargo, contactonan na Boneiró a

confirma cu e scol aki ta frecuenta tanto Boneiro como Aruba. Obersevadornan marino na Boneiro a mira e potretnan saca na Aruba y a reconoce algun caracteristicanan unico di e animalnan, cu ayera tabata actua diferente cu siman pasa.

E animalnan tabata bati nan rabo cada rato, tabata drenta den diferente formacion y te hasta tabata bula sali for di awa. E interes di publico na canto di beach tabata grandi, despues cu radio a anuncia nan presencia. AMMF lo sigui ta pendiente pa mira si e dolfijnnan aki, considera e especie di dolfijn mas inteligente, lo bolbe, y asina determina e motibo pakico nan ta yega asina cerca di Aruba. Tin diferente teoria, entre otro, cu ta bin haya baby den nos awanan, pero cu tin actividadnan submarino dilanti costa Venezolano cu ta pusha e scol di Stenos, mas cerca di Aruba.

